

Zeitschrift: Igl Ischi : organ della Romania (Societat de Students Romontschs)
Herausgeber: Romania (Societat de Students Romontschs)
Band: 60 (1975)
Heft: 4

Artikel: La muncona da plevons illa vart reformada
Autor: Bertogg, Vincens
DOI: <https://doi.org/10.5169/seals-882388>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 01.04.2026

ETH-Bibliothek Zürich, E-Periodica, <https://www.e-periodica.ch>

La munconza da plevons silla vart reformada

da ser Vincens Bertogg

La muntada dil plevon en nossas raspadas

Tenor ils reformaturs dat ei negina differenza fundamentala denter plevons e laics. Mintga cartent ei ton sco in sacerdot, tuts ein spirituals.

Martin Luther defenda quella tesa cugl argument che la cuminonza cristiana formeschi in tgierp. Ed en in tgierp hagien tut ils organs la medema dignitad.

Tonaton suonda Luther buc ils entusiasts da siu temps che levon dismetter igl uffeci parochial e schar perdegar mintgin che sesenteva zaco inspi-raus. Sco quei ch'in tgierp ha differents organs cun differentas funcziuns, aschia era la raspada cristiana. Igl ei buca dau a mintgin dad ir sin scanschala, sco quei ch'igl ei buca dau a mintgin da sunar l'orgla. Perquei duei ins partgir si la lavur ed eleger in um adattau sco verbi divini minister. Quel duei plidar per ils auters e sorprendere l'administraziun dils sacraments e certas spartas dalla tgira dallas olmas.

Sin quei pareri dils reformaturs sebasea igl uorden davart igl uffeci parochial ellas baselgias evangelicas. Il plevon ei buc impurtonts sco persuna. Impurtonts ei il plaid ch'el ha da gir.

Mo tgei duei daventar, sche negin vul studegiar el e sorprendere la missiun da perdegar el?

La situaziun ei alarmonta

Ils davos onns vess la baselgia evangelica dil Grischun giu occupaziun per silmeins 70 plevons. Mo nus vein per temps buca giu dapli che 55 ni 60 sinodals activs, e pil mument mauncan aunc sis. Quellas cefras dattan da patertgar, cunzun sche nus dein in'egliada sillas forzas giuvnas che vegnan suenter. Denter 1971 e 1973 ei buc in sulet maturand grischun s'immatricolaus pil studi dalla teologia evangelica. Per cletg vein nus saviu prender si en nies miez predicants dalla Svizra bassa. E buca meins che 20 pervendas ein ussa occupadas da plevons ord igl exterior. Schiglioc fuss la situaziun aunc mendra, e nos veterans fussen sfurzai da star en uffeci tochen la mort.

In problem special ei la munconza da plevons che discuoran romontsch. Avon in pèr onns vevan nus el Colloqui Sur igl Uaul aunc sis predicaturs romontschs. Ussa restan aunc treis.

Ei drova pli e pli biaras forzas

La scartezia da plevons stat en connex cul svilup rapid ch'ils davos decennis han purtau allas tiaras industrialisadas. Certas agglomeraziuns dalla Bassa creschan cun ina tala spertadad, ch'ei duvrassen mintga dus onns in plevon dapli. Era la diversificaziun dallas scolas augmenta il diember dils uffecis. Plinavon ein las baselgias s'adattadas als basegns dil temps ed han delegau biars teologs sin posts specials per la pastora-ziun telefonica, la scolaziun dils carschi, igl agid en tiaras jastras, il sur-vetsch da radio e televisiun, il studi da problems socials etc.

Bein han era las facultads teologicas registrau in carschament dil diem-ber da students. Mo cheu exista il medem problem sco els seminaris da scolasts. Ina buna part dils discipels ein feminins e san buca sorprendere in survetsch cumplein che cuoza biars onns. Perquei stuess il diember dils students s'augmentar cun ried, ed era Grischuns stuessen semetter davos ils cudischs.

Pertgei studegian schi paucs?

Il students dalla teologia serecruteschan plitost ord las parts activas dal-las raspadas. E nus savein tuts che quella glieud engaschada representa ina minoritad. Bia memia biars secuntentan cun in cristianissem passiv. Ei discuoran sur dalla baselgia ella tiarza persuna. E lur affons ston sur-vegnir l'impressiun che la religiun seigi gest aunc buna per decorar las fossas ed embellir certas fiastas. Ei secapescha ch'in tal minimalissem re-ligius ei buca fetg adattaus per animar zatgi tier in studi teologic. Motivs opportunistics san gie strusch giugar ina rolla pli, pertgei il talar garante-scha negina posiziun dominonta ella societad. Oz vegn il plevon attac-caus e fatgs ridiculs da biaras varts, ed il giuven teolog drova ina buna purziun idealissem.

Ins astga gie buc emblidar, contas autras pusseivladads ch'existan per el. Era sch'el deriva ord ina famiglia pauc beinstonta, sa el oz studegiar dad inschignier e miedi, ed el vegn franc a cattar lavur en quellas clamadas. Quei fuva buc aschia tier nos antenats. Per biars dad els era la teologia la suletta pusseivladad realistica, sch'els levan insumma contonscher in grad academic. Cun quella remarca lein nus buca snegar igl idealissem dils vegls. Biaras pervendas eran da gliez temps aschi paupras ch'ellas savevan strusch garantir al plevon in'existenza undreivla. E la lavur culla

reit digl evangeli ei adina stada ligiada cun problems. Quei savevan gia ils apostels.

Refuorma dil studi?

Il studi dalla teologia evangelica cuoza circa diesch semesters, sch'ils lungatgs vegls (latin, grec e hebraic) ein gia empri. En quei temps sefatschenta il student cull'interpretaziun dalla Bibla, culla historia dalla baselgia, culla teologia sistematica e pratica, culla filosofia e cun las religiuns nuncristianas, cun psicologia, sociologia e roms pedagogics. Igl ei clar che quella procedura stermenta beinenqualin che vess schiglioc tschaffen per in survetsch ecclesiastic. Auters vessen bein la curascha pil studi, mo els ein dall'idea che la scolaziun descretta prepari buc els silla pli impurtonta missiun cristiana. Ei fan pli bugen ina scola per lavur sociala ni in studi da psicologia. Aunc auters entscheivan il studi ed anflan pér lu buca la punt tier il survetsch ella raspada.

Il studi stuess pia vegnir adattaus empau meglier als basegns concrets dalla raspada. E lezza stuess far plaz era per quellas forzas che san buca frequentar il studi tradiziunal.

Da l'autra vart eis ei clar ch'il predicatur scolau astga buca muncar ella baselgia, sche nus lein buca schar degenerar il priedi digl evangeli. Cunzun ellas controversas spirtalas dad ozilgi stuein nus haver umens e dunnas che han empriu dad argumentar en damondas dalla cardientscha.

Biars fuin digl uffeci parochial

In amitg che docescha alla facultad teologica da Gottinga scriva: «Gia all'entschatta dil studi declaran 45% dils students ch'els hagian buc il plan dad ir sin pervenda. E biars discuoran buc auter, cu il studi ei a fin. Ei fan il doctorat ed aspireschan sin in post all'universitad; ei emprovan da vegnir suttetg en in institut ecclesiastic, ni ch'els sepreparan per in uffeci da magister alla scola media.» Exact il medem maletg seporscha tier nus en Svizra. Il post special ei encurius, mo la pervenda buc.

Quei ei buca mo la conseguenza d'in studi nunadequat, mobein era in'enzenna ch'il concept digl uffeci parochial ei buca cuntenteivels pli.

La rolla dil plevon ei surcargada. Tgi che va sin pervenda resca da davenstar in factotum che lavura en siat differentas clamadas. Ins ei perdegader,

diacon, pedagog, cusseglader da lètg, luvrer social ed econom en ina persuna. E quei cuntenta naturalmein buc. Quella rolla diffusa dil plevon sto plaunet vegnir precisada. Nua che auters ein pli cumpetents, duein auters haver il plaid. Mintga cartent duei surprender ina funcziun tenor ses duns e sias pusseivladads. Umens pensiunai san daventar diacons, dunnas che han peda san dar uras da ductrina, ed il miedi ei era cristian e sa gidar ella tgira dallas olmas. Nus vein veramein motiv da svegliar ils talents zuppai en nossas raspadas. Buca mo pervia dalla munconza da plevons, mobein per turnar tiels principis dalla reformaziun.

Ina buna propaganda ei necessaria

En bia graus ei la glied giuvna buc informada scosauda davart il studiologic e la lavur d'in plevon. Perquei fuss ei neras uras, che nus preparassen puspei inaga in survetsch divin en casa da scola, ensemen cun ina gruppa da nos parochians, aschia che quels havessen investa en nossa lavur e fussen sez puspei engaschai empau dapli. La stermentusa distanza denter plevon e raspada che exista deplorablamein aunc adina sto svanir.

Era davart las novas pusseivladads da studegiar teologia senza la matura dil gimnasi fuss inaga dad orientar. Cheu vessen era ils cussegladers da clamada da segidar.

Per part fagein era nus plevons ina schliata reclama per nossa clamada, enaquella che nus lamentein ad in lamentar. Nus astgassen era mussar ch'ei sa esser bi da luvrar ella raccolta dil Segner.

Tgei porta igl avegnir?

El novissim temps cumparan profets, ils quals fan valer che la munconza da plevons seigi prest vargada. Ei argumenteschan culla nova crisa mundiala che fetschi tschessar la conjuntura ellas tiaras industrialisadas. Cheutras serestrenschen las pusseivladads per la giuventetgna studentica, ed il survetsch ecclesiastic daventi lu puspei interessants.

Podà, ch'els han raschun. Mo tals aspects duessen buca surmenar nus da renunziar allas refuormas urgentas: Refuorma dil studi, activaziun dalla raspada, nova concepziun digl uffeci parochial.